

Libro na sinji Mateo

Ñ'oⁿ xco 'na^m Jesucristo na sinji Mateo

Capitulo 1

Tsjaⁿ nn'aⁿ na^m tuiñeⁿ Jesucristo

Ref. (Lc. 3:23-38)

1 Nua ñ'oⁿ na matsijnda'ñeⁿ ñja'na^m tsjaⁿ nn'aⁿ na^m tuiñeⁿ Jesucristo, jndacañjo David, jndacañjo Abraham.

2 Abraham, jo' tye Isaac, Isaac tye Jacob, Jacob tye Judá quio cha'tsoñeⁿ ntyje.

3 Judá quio scu' na jndyu Tamar, ndahe Fares quio Zara, Fares jo' tye Esrom, ndo' Esrom jo' tye Aram.

4 Aram jo' tye Aminadab, Aminadab tye Naasón, Naasón tye Salmón.

5 Salmón quio iiscu Rahab, ndahe Booz, Booz quio scu' Rut ndahe Obed, Obed tye Isaí.

6 Isaí tye David ts'aⁿ na tonuiñeⁿ rey, ndo' rey David quio Betsabé scu' ts'o Urías, johe ndahe Salomón.

7 Salomón jo' tye Roboam, Roboam tye Abías, Abías tye Asa.

8 Asa jo' tye Josafat, Josafat tye Joram, Joram tye Uzías.

9 Uzías tye Jotam, Jotam tye Acáz, Acáz tye Ezequías.

10 Ezequías tye Manasés, Manasés tye Amón, ndo' Amón jo' tye Josías.

11 Josías tye Jeconías quio ntyje, joo tom'aⁿhe quiaxjeⁿ ty'e nn'aⁿ Israel preso ndyua Babilonia nge na^mtsu nn'aⁿ Israel ndyiaⁿ.

12 Nqui' na jndę tyinoⁿ tyecho nn'aⁿ Babilonia nn'aⁿ Israel ndyua 'naⁿhe, tuiñeⁿ jnda Jeconías na tojndyu Salatiel, Salatiel jo' tye Zorobabel.

13 Zorobabel tye Abiud, Abiud tye Eliaquim, Ndo' Eliaquim jo' tye Azor.

14 Azor tye Sadoc, Sadoc tye Aquim, ndo' Aquim jo' tye Eliud.

15 Eliud tye Eleazar, Eleazar tye Matán, Matán tye Jacob.

16 Ndo' Jacob jo' tye Se, Se sa' Ría, iinaⁿ ndahe Jesús na conuiñeⁿ Cristo.

17 Jndęⁿ nqui ncho nque ndua^m tsjaⁿ nn'aⁿ na tom'aⁿ, tyeto Abraham, taxjeⁿ na tyiñoⁿha' David. Ndo' cuicheⁿ nqui ncho nque ndua^m tsjaⁿ nn'aⁿ na tom'aⁿ, tyeto David, taxjeⁿ na tyiñoⁿha' na ty'e nn'aⁿ Israel preso ndyua Babilonia. Ndo' cuicheⁿ nqui ncho nque ndua^m tsjaⁿ nn'aⁿ na tom'aⁿ, tyeto xjeⁿ na tyecho nn'aⁿ Babilonia nn'aⁿ Israel, taxjeⁿ na tuiñeⁿ nqui Ta Cristo.

Nua ba na tuiñeⁿ Jesús

(Lc. 2:1-7)

18 Nua ba na tuiñeⁿ Jesucristo: Nda'cheⁿ ba ñoⁿnca 'na^m Ría quio Se, ndo' cuatjacheⁿ na ntjoⁿñeⁿ quio ntyjehe, tyinquio na jndę jndiñeⁿ Ría quio najndi Añuaⁿ Nju' 'na^m Ty'oqots'oⁿ.

19 Ndo' Se, ts'aⁿ na nnuiñeⁿ sa' Ría, juu tuiñeⁿ cui ts'aⁿ na ya 'naⁿ toch'e. Tyi'n'ue ts'oⁿ na nnui'jnaⁿñeⁿ Ría, ngejo' sityiu na cue'nty'iuñeⁿ nntyui' ñoⁿnca 'naⁿhe.

20 Yocheⁿ na nua' matsityiu Se, tyinquio'ñeⁿ cui ángel 'na^m Ty'oqots'oⁿ naqui' tsatsjo^m na matso nnoⁿ:

—'U Se na conuino^m jndacañjo David, tyi'nty'ue' na nngoño^m cuenta Ría na nnuiñeⁿ scu'. Nge ii'nda na jndiñeⁿ Ría jnda Añuaⁿ Nju' 'na^m Ty'oqots'oⁿ conuiñeⁿ.

21 Ndo' nng'oⁿ cui jnda iichjo iis'a, ndo' 'u nntsa' na njndyu Jesús, nge juu nncwji' 'maⁿñe' nn'aⁿ na nnayu' juu.

22 Cha'tso nue^m tui quiajo' nnquinoⁿha' ñ'oⁿ na sineⁿ Ty'oqots'oⁿ quio ñ'oⁿ 'ndyo profeta,

23 quiaxjeⁿ na tso: Que^mho' cuenta, cui iiscuña nnui'jndiñeⁿ ndo' nntsingui cui ii'nda ndo' 'u nntsa' na njndyu Emanuel. Ñ'oⁿ Emanuel ñe^mtsoha': Ty'oqots'oⁿ m'aⁿ quionjo jaa.

24 Xjeⁿ na ncu' Se na matsichju tsatsjoⁿ juu s'a chaxjeⁿ na matso Angel 'na^m Ty'oqots'oⁿ, ndo' to'ñoⁿ cuenta Ría na nuiñeⁿ scu'.

25 Xaⁿjo' tyi'c'oⁿ Se quio scu' ndyi'ño^mñ'oⁿ taxjeⁿ na jndę singui scu' ii'nda na jndye. Ndo' s'a Se xue' ii'nda 'ñeⁿ Jesús.

¹ Espiritu Santo. Verso 20